

# Santiago

---

## Israelwei misag truørø amba warabelan Santiago pørøb

**1** <sup>1</sup>Na Santiago Tiusweimba, Señor Jesucristoimba marøb megabig Israelwei doce nusrkaløgurri misag nørø larrøbicha, pirau kan ørøtø amba warabelan ‘ka amønñiguh’ chinrrab inchar.

## Tiuskurri kusrebig kømig

<sup>2</sup>Nai nunelø, chigøben, chigøben puig meløwabe, truba tab kui inchib, kasraaray, <sup>3</sup>kaguende ñimui isubigwan Jesucristoinuutø pasra tøgagúigwan maig kõtashchab marigugurrimbe masken tammay melamig arrubig kui ñim ashibeløbe. <sup>4</sup>Inchendø ñim tru treeg tammay kullaaramø, ka melaibe, newanig kønrrai inday, chiyugucha neilø, chi isumgaig newan pønrrabelø, yandø chiyugucha palømø newanelø.

<sup>5</sup>Ñimun møigwan køben øyeeløyu tab asha maramigwan kusrebig kømig paløbene, Tiuswan miao, nøbe tranrrun. Kaguende nøbe mayeelan tranøppe, merøbalatø tranmøwei, katø chi miabene, namømøtø, tammay tranøbig køn. <sup>6</sup>Inchendø miappe, ke Tiusbe tranrraitamab isua miamig køn, treeg kømuptinchaitamab maizhikken chi treeg isumøtøgue. Kaguende chi treeg kømønrrab kø chindermab isubiibe kan maryu pi welarwan isig ichibig amburab, iburab srua yaig lataig køn. <sup>7</sup>Møikkøben treebe Señorwan chigøben utamuitamappe isumøta. <sup>8</sup>Kan møg møindø øyeeg martrab isub, katøguen srønabe peetø isubiibe, chiyutøgucha mumayguen kømfiig unan.

<sup>9</sup>Kan truburab chiga nunezhigwan Tius nune truba nuig marene, purø tab kui møramig køn. <sup>10</sup>Inchen puaibe purø tab kui møramig køn, Tius nune chigucha kømfiig lataig marene. Kaguende puaibe kaumerayu u lataig kua, pasrabig pasrønrrab kaiman. <sup>11</sup>Pøs pørr webarrua, purø mur pachene, kaube mul-laben, ube peñen, tru tabzhiibe yandø pinan. Øyeetøwei puaikkucha nui chigøben penab, yanøb uniiløyu pinønrrun.

## Chinetø kaig pub arringucha treegu ka megab

<sup>12</sup>Chigøben pub arruben, tammay megabig megabiibe mayanguen tab kuig køn. Kaguende treegu puraya pasramisøppe, nun undaguelan Tius keta tranrrab

kørrømisrig tru øsig køm coronan utønrrun. <sup>13</sup>Møigwan køben chiyugøben kaigyu kebenamdiig mørørabene, Tius treeg isunandan chimøta. Kaguende Tiusbe mana kaigu kebenamdiig kuig mørørai wamøwei, ni katø mun kaigu kebenørkønrrab inchimøwei inchibig køn. <sup>14</sup>Treeg kømøtø, møigwandøgucha nui kaig isubeløtøwei srua iben, truiløtø yandø tabig lataig asønangarua kebenørskaim pasran. <sup>15</sup>Inchen tru trømbøig isuilø yandø umbu kebya, pasramisrikkurrimbe, kaig maramig kalkan. Inchen tru kaibe yandø ne nurappe, kwamigwan kal-lanrrai mara pasran.

<sup>16</sup>Nai undaaraig nunelø, ñimnguen pella peemaytø isub pønrrømøtay, <sup>17</sup>chitøgucha tabig ketiiba, katø chigøben tabig newan marøbelø kønrrai ketiibabe srømbalårngurri arrubig køn, tru srømbalårø chine pilab pønrrabigwan marøbig Tiusweinukkurri. Nøbe nø maig køppe, manatøgucha treetø kua, nuinuube løstørab lata inchib, tømrisrøb lata inchib, inchibiibe chigagøn. <sup>18</sup>Nun trendø treeg marøg kuikkurri, nui newan cierton wamdøga namune katøyug srøig kal-langaruig køn, nø kerrigu misagwan ellmara pønrrailai utu nammerrig ke srøsrø ellmarig misrig latailø kønrrai.

### **Kalutøga møriitø kømø, maramig køn**

<sup>19</sup>Nai undaaraig nunelø, iigwan isuy: ñim mayeeløba møramigwane muniitø purramig køn. Inchen wamindamigwanba, namamigwanbabe tsøndatø isuptø maramig køn. <sup>20</sup>Kaguende kan møg namig kōtanmaptø mariibe Tiuswei sølgandø tabigwan marmøn. <sup>21</sup>Inchawei treeg købene, ñimbe ashikken kønrrabgaig marigwanba, chigøben kaig mariilø trutø netsaig tøgagúilanba webeta elacha, Tiuswei wamwan ñimui manrrau ellgwaigwane mur kurrashmø, tammay utay. Kaguende tru wam wamindiibe maramburab marøbig køn, ñimui møsigwan wesramig.

<sup>22</sup>Pøs Tiuswei wamwane maig martrain taigwan ñimbe marøbelø kømig køn, ka møratø, møratø kønrrab kømøtø. Trengømuisruandøbe, chi mørmui lataitøwei ñimasiitø ka kegørrab pønrraig webinrrun. <sup>23</sup>Kaguende møikkøben Tiuswei wamwan mørøptø møra, tru maig taigwan møra marmübe, kan møg nui maløwan espejoyu ashibig lataig køn, <sup>24</sup>nui malø maig kuigwan asha, katø llirawa, ippe, pesannab lataitøweingue. <sup>25</sup>Inchen møikkøben Cristo maig martrai karua pasrig newan sølgandiig, tru chi ilørskaimiig kønrrai marøbigwan ke tab asha, truyu megabig megawa, tru martrai karuigwan pesannaptinchimøtø marøbigweimbe, nui mariiløyu mayanguen tab kuig kønrrun.

<sup>26</sup>Ñim møikkøben, Tius martrai karua pønrrailøyu maizhikken purø punømø marøbig kurmba isubendø, nui niløtøgabe maig kurrøbashtø waminchibiibe nøasiitø kebeñib pasran. Inchen tru nø Tiusweiwan maizhikken purø punømø marøb pasrab taibe chi marmui lataitøwei webyan. <sup>27</sup>Tius Møskawei merrab tru nø karuilan maizhikken pinab marmø, chillig indiiimig mariibe, iig køn: usri møkai, peta kwailanba, kelø peta kwailanba chigøben isuig meløben isua ashchab ambub, katø yu pirau kaig trømbøig arrubiitøga chillig incha pønrrømøwei indamig.

## Misaameran mõilandõgucha lata wamamig

2 <sup>1</sup>Nim nai nunelõ, ñimui isubigwan namui Señor Jesucristo tõrguegwalmabigweinuutõ tõga põnrrowabe kanundõ tab wamab inchimõ, mundõgucha lata kõmig kõn. <sup>2-3</sup>Nim tulundzuna purrõbenma, kan truba pua mõg oro surtigiastiig, truba tabig keweig pubene, truba tabzhig wamab, ñimbe trenchinrrun: “Yu katõguchi tab wamdõnug warra” cha. Inchen trunetõ katõgan, kwa waacha, truba shautõzhig chilliguig keweig pubene, ñimbe trunune trenchinrrun: “Ñibe õsrõndõ, ka pasrau” cha; kabe: “Uyu pirau wamir” cha. <sup>4</sup>¿Treeg marõppe, ñimui utu ñimdõweinguen kanune yandõ nõrõ marõbguen põnrromõtirru? ¿Ñimbe kaig isuaguen treeg inchib põnrromõtirru?

<sup>5</sup>Nai undaaraig nunelõ iigwan mõray: ¿Tiusbe yamba yu pirau waachameranwei lawa wesruig kõmuitarru? ¿Nõmbe isubigwan Jesucristoinuutõ pasra põnrraigwan tõgagõmburab tõgagõb, katõ nun undaguelan tru nõ ashib karub waigwan Tius tranrrab misra kõrrõmisrigwan chigucha utõnrrabelõbe nõmwein kõnrrai marig kõmuitarru? <sup>6</sup>Trune ñimbe waachamerane chigucha kõmfõig marõb ka kõrig maran. ¿Tru puarmerawein kõmuitarru ñimune mõra melõnrrai marõb, katõ misagwan ashib karub purrabelaimay ñimun uñchib waram srua ambubelõbe? <sup>7</sup>¿Tru Cristoi purõ tab munchiwan ñimun pasra wamigwan nõmweinre purõ tõrmbõig wamabelõ kõmuitarru?

<sup>8</sup>Tius tru martrai karua pasrig purõ nuig, nui wam põrigu pasrabigwan, maig chibig kõben ñim treeg mõra marõb põnrrowabe, sõl marõb põnrõnrrabguen: “Tru mendaigwangucha, ñiasig lataitõwei undaarau” cha trendaigwan. <sup>9</sup>Inchen ñim kanune tab inchib, kanune maig kõbash inchib põnrrappe, ñimbe kaig marõb põnrran. Inchen tru maig maramigwan martrai põra trarriitõwei ñimune ‘kalõ marõb itõbunab põnrran’ cha ñimundõwei itõõra pasrtrun. <sup>10</sup>Kaguende tru maig maramigwan martrai Moisés põrigwan mõikkõben kerriguh mõra marõppe, marendõ, tru utu kanundõguen kalõ marõb itõbunikkurrimbe mayamba kalõ mara pasraig kõrrõmisran. <sup>11</sup>Kaguende: “Itõlulamig kõmõn” chibitõwei, treekkucha taig kõn: “Kweetsamig kõmõn” cha. Inchawei mõikkõben itõlulmuingucha, kweechibiibe, tru maig maramigwan martrai Moisés põrigwane itõbunan. <sup>12</sup>Nimbe wamindiilõyu lata, amõnailõyu lata tru maig maramig chi ilõsrkaimiig kõnrrai marõbig nõmun maig asha maramigwan marig kõmig, ke yandõ treeg maramig puim põnrrab misaamera lataig kõmig kõn. <sup>13</sup>Katõganelan lastimaguengaig marõbelane, nõmungucha treetõwei lastimagaig marõb asha kõrrõmariilõ kõnrrun. Trune, tru lastimabaig marõbelõbe, kõrmõ, tab kui webamba põnrõnrrun, tru maig kõnrrabigwan asha maren.

**Isubigwan Jesucristoinuutø pasra kuiba,  
chigøben tabig mariiløba**

<sup>14</sup>Nai nunelø, ñim møikkøben ‘isubigwan ke Jesucristoinuutø tøga pasrabig kur’ chibendø, chigucha tabig marøb kenamarmubene, tru ‘isubigwan pasra tøgagur’ taibe, ¿chiwein kuin purugunrrab kø? ¿Kabe tru isubigwan Jesucristoinuutø tøga pasrab taig, truitø ñun kaigyugurri wesranrrautah? <sup>15</sup>Kan nunewan kui, kabe kan nuchawan kui kemig truburab chigawei, kwalømmerawan chi mamig chigawei megamne, <sup>16</sup>ñimma møikkøben trendaimbeh: “Chi isumø, tab inrrig chib. Pachiitø kønrrai tsitsø keb, øska mab, muchib uñchig” cha. Inchendø asru maig palain pasrøben chi tranmubendøbe, niløtø pasrainguen kønrrun. <sup>17</sup>Inchawei øyeetøwein køn, ‘isubigwan Jesucristoinuutø pasra tøgagur’ taig, chigøben mariilø chigaibe, nøasiitø kwaig køn.

<sup>18</sup>Inchendøgucha møibe trenchinrrun: “Isubigwan Jesucristoinuutø ñibe tøga pasrøben, nabe chigøben tabig mariilø tøgagur cha. Ñui isubigwan Jesucristoinuutø pasra tøgagúigwan chigucha tabig mariilø chigaig nan kenamartra cha. Inchen nai isubigwan Jesucristoinuutø pasra tøgagúigwane nabe chigøben tabig mariiløtøga ñun kenamartrumøn” cha. <sup>19</sup>Pøs Tiusbe kandø kønmab isub, ñi kørewa pasraibe, trumaybe sølwein køn. Inchendø kwaimandziimeragucha Tiusbe kandø kønmab kørewa, katø kørig køb itø nab inchibelø køn. <sup>20</sup>Au, ñi chugúí mormíig, nebua ashchab inchi, isubigwan Jesucristoinuutø pasra tøgagúig, chi tabig mariilø chigaig, ka yandiibe chigucha kómíig kuin kui. <sup>21</sup>¿Namui merrabsrø møskai Abrahamma nui nusrkai Isaacwan tru altar marinug truyu Tiuswan trana, kwetchab trarren, nune chi kaig kómíig lataig tabig kørrømarig kómuitarru? <sup>22</sup>Inchawei, ¿Abrahamweimburabma ashmøtirru, nui isubigwan Tiusweinuutø pasra tøgagúibe tru chigøben mariiløba truibamisra kanbalatø marøb pønrrabig kui? ¿Inchen nui isubigwan Tiusweinuutø pasra tøgagúibe tru mariiløgurri kerrigu newan marig kørrømisrmuitarru? <sup>23</sup>Inchen Tiuswei wamwan pørigu øyeeg taibe nebuig køn: “Abrahambe Tiuswan køreikkurri Tiusbe nune sølgandø tabig kui asha tøgagúig køn” taig. Incha nune ‘Tiusba truba tab linchibig’ cha, wamig købig køn.

<sup>24</sup>Inchawei ñimnguen ashen, Tiusbe kan mowane nui tabig mariiløgurrimba chi kaig kómíig lataig tabig kørrømaran, isubigwan Jesucristoinug pasriitøgatø kómøtø. <sup>25</sup>Katø treetøwein kuig køn, ¿tru Rahab, nui asrwan anwei yanøb ishuuma, tru maig køtasha asha wam sruamrunrrab ambubelan nøbe ya pebamba, katøgan peg maywan amrrai eshkamba, øyeeg tabig marikkurri nune chi kaig kómíig lataig tabig kørrømarig kómuitarru? <sup>26</sup>Kan asrma chi espíritugaibe kwaig køn; katø treetøwei isubigwan Jesucristoinuutø pasra tøgagøppe, tøgagøbendø, chi tabig mariilø chigaibe kwaitøwein køn.

### Niløbe truba kaig marøbig køn

**3** <sup>1</sup>Nai nunelø, ñimui utube mayeeløbabe kusrenanøbeløtø kønrrab isumøtay, nam kusrenanøbelane maig kønrrabigwan asha marøppe, ka palatiig kømø, martrab kui ashibelø kuig køppe. <sup>2</sup>Kaguende nambe mayeeløba chiyugøben kalø marøb pellibelø ker. Inchen møikkøben nui wamindigu pellmíbe, tabigwan newan sølgandø marøb møg køn. Treebe nui asrwangucha kerriguba maig købash kømønrrab isua møra tøgagøn.

<sup>3</sup>Kaullimeranma nam trigu tsi muusrøppe, muwan inrrain kesruben mørtraí muusrøbelø ker, asr ørøba kønørramamø merrarramig. <sup>4</sup>Katø barcomeran chigucha asay. Yeeg nørreelø purø mur isig ichibig srua ambiilø kuingucha, barcon muba inrrai inchib pasrabig kan lamøtiitøgatø truyu purrabeløbe nøm muwan ambug køben truwan øran. <sup>5</sup>Katø niløgucha øyeetøwein køn: Asru purø lamíig købendø purø nuig misrøb, chigøben purø nørreelø martrab waminchibig køn. ¡Kan lamø naazhikkurrindø kan srønø tsibwan muba kuimburab parrøbig køn! <sup>6</sup>Inchawei niløbe kan nag lataig køn, namui asru kaitø netsaig, asr ørøba trømbøig marøb mindishibig pasrig tru niløbe. Tru møra melamnug naarab pasrabiitøgatøwei piløga pasrig køn. Incha nam øsig kuingurrimbunø kwamnegatig pilab pasrabig pasrønrrun.

<sup>7</sup>Møøbe chigurrimbunø namig animalmeran køben, illimeran køben, ulmeran køben, maryu purrabelan køben kusrenanamdiig køn. Inchawei misaamerabe merrarrawa kusreezheelø marøbelø køn. <sup>8</sup>Inchendø niløwan kuimbe mugucha kusrenanrrab kaiman. Purø kaig kua, chinchaguen treeg marmønrrai merrarrawa tøgagønrrab kaimaig, kweechib larrø trømbø møtø netsaig køn.

<sup>9</sup>Nambe niløtøgabe namui Tius Møskawan tabig wamindamba, katø Tius nø lataitøwein kønrrai mari misaameran tru niløtøgatøwei trømbøig nebunrrai wamindamba inchibelø ker. <sup>10</sup>Tru trigugurrindøwei mayanguen tabig kønrrai wamindamba, trømbøig nebunrrain chib wamamba indan. Nai nunelø øyeebe maramig kømøn. <sup>11</sup>¿Kan pigabyugurrindøwei chish pi webarrumba, kaig pi webarrumba inchaudah? <sup>12</sup>Nai nunelø, ¿kan higuera tusr købendø, aceitunas niguen, katø kan uvas tusr købendø, higos niirraudah? Katø treetøwei kan tre pigabma truyutøwei tab pi weguchimøn.

### Kusrebig kømigwane Tius tranøbig køn

<sup>13</sup>Møikkøben ñimui utu truba kusrebig, trurrigu chiwan køben tab chigúi mørøbig kuabe, maig købash kømø, tammayig kuitøga kenamar, nuig kurmab inchimøtø, larrø tammay marøb unigu, truba kusrebig kuiyugurri arrubiitøga. <sup>14</sup>Inchen treeg kømøtø, katøganweimburab ñimui manrrau ke chinchimmøø inchib pusrkwai asiibah, chiyutøgucha ke nømerrig kønrrab indiibatø tøga pønrrøwabe, ñimbe truba nørreelø kusrebelø kermab inchimøwei, tru

newan ciertonigwan isab pønrrømøwei inday. <sup>15</sup>Kaguende kusrebig kuig øyeebe Tiusweinukkurri arrumøtø, ka i piraugurrindø arrubig ka møwei isuiløyugurrimba, nugwaimandzigweinukkurrimbe arrubig køn. <sup>16</sup>Kaguende ke chinchimmøø inchib pusrkwai asiibah, chiyutøgucha møig kanab marøbig kõtashchab indiibatø pønrrabnuube, ambumay imay ke mumay købashtiibah, katø chigurrimbunø ka trømbøig mariiløbatø pønrran. <sup>17</sup>Trune tru kusrebig kømig Tiusweinukkurri arrub iimerrig køn, chishig. Trugurrimbe ambugurri igurri tab kønrrai indamig, katøganelø chigøben indingucha tammayig kømig, tab kui mørøb kasraatø pønrrønrrai marøbig kømig, katøganun chigøben nebui megaben, truba truba lastima ashibig kømig, tabig marøbig kømig, kanelane ørø mara, kanelandø tab inchimig kømig, ka treeg kønmab ashchайдø kømø, maig maramigwan marøbig kømig, treeg køn. <sup>18</sup>Inchen ambumay imay tab kømigwan tøgagønrrab tru ambumay imay tab købiitøga ellmarøbeløbe, sølgandø tabig ellmariilø tulishinrrun.

#### Pirauigwan tab kui inchib pønrrømumig

**4** <sup>1</sup>Trømbøig kwayam lailøba, namishib chinetø cha møriiløbabe ñimui utube ¿chugurrinrre arrubig køh? ¿Ñimui umbu trømbøig kaig isubelø ni kan mandøguen kømíig pønrraptø pønrrøwa, truyugurrinrre arrubig kømuitarru? <sup>2</sup>Ñimbe chigøben tøgagønrrab inchendø, tøgagønrrab kaiman. Kweetsamba, katøgane chi tøgagømønrrai ke chinsraatø indamba indan. Inchendø chinchagucha tøgagønrrab kaiman. Incha ñimbe chinetø chib menda, trømbøig kwayan. Ñimbe chi tøgagønrrab isuigwan tøgagønrrab kaiman, kaguende Tiuswan miameeløgurri. <sup>3</sup>Kabe miappe, miabendøgucha, utønrrab kaiman, kaguende søl isua miamøtø, ka ñimui asrwan tab kønrrai kasraarab kømigwayasiitø miabelø kuikkurri. <sup>4</sup>¿Ñim, Tiuswan itøluløptø misamera! ¿I pirauigwan tab inchib chull inchibiibe Tiuswane ashig kømui inchibelø kui ashmeelø køtirru? Inchawei møikkøben i pirauigwangøba tab kui mørøb llirabiibe, Tiuswane ashig kømui inchibig misran. <sup>5</sup>Kabe Tiuswei wamwan pøriiløyu øyah chippe, ¿ka trenchig køptø trendaitamab isutirru ‘tru espíritun Tius namui umbu pasrønrrai traniibe namune ¡katø! nuyasiitø kønrraimab undaaran’ chibigwan? <sup>6</sup>Inchen Tiusbe nui ka yandø tab indiitøgabe namune katøguchinguen tranøbig køn. Incha nui wambe trenchibig køn:

“Nuinetø nuig mørørai inchibelane

Tiusbe sötøbasramisrøb kurrappe,

trune chigucha kømeeelø tammayelane

nui ka yandø tab indigwan Tiusbe tranøbig køn” cha.

<sup>7</sup>Ñimbe Tius maig chiben nune tru kuindø møyay. Trune nugwaimandzigwane mørmønrrab mur isua pønrrai, treeg pønrrøbene, ñimuinukkurrimbe lulrrun. <sup>8</sup>Ñim Tiusweimay kemallene, nøbe ñimuimay kemallchun. ¡Kaig marøbelø, ñimui tasigwan chish maray! ¡Ñim Tiuswan undaaranrrab indamba, katø tru urastø yu pirau chi købigwan

undaaranrrab indamba inchib misaamerabe ñimui manrrømeran newan chish maray! <sup>9</sup>Ñimbe truba isui inchib, chindimbarre nambe øyeeg kailø kermab truba isub, katø kishib inday! Ñimbe indzabgunrriibe kishib; kasraarabgunrriibe truba isui inday. <sup>10</sup>Ñim Tiuswei merrab utsøbasrene, nõbe ñimune nõrreelø kønrrai martrun.

### Maig maramigwan nai nunewan ke na asha marmumig

<sup>11</sup>Nai nunelø, kangurrin kangurri katøganun chigøben kaig wamincha ashmøtay. Møikkøben kan nunewan kaig waminchib, kabe ‘øyeeg søl marmíig køn’ chib, waminchibiibe, tru maig maramigwan martrai Moisés pørigwan kaig waminchib ‘søl marmøn’ chib pasran. Inchen ñi tru Moisés pørigwan kaig kui marøb pasrøwabe, ñibe trunun møra marøbig kømøtø, ñiguen ‘øyeeg køn’ chib asha marøb pasran. <sup>12</sup>Inchawei mu katøgane kaaben, Tius nõtø køn tru maig maramigwan martrai pøriilan tranøb, katø nõtøwei maig maramigwan sølgandø asha marøb inchibiibe. Truibe nõ kaigyugurri wesruin kui, kabe kaigyu pasrin kui nõ ashchabig køn. ¿Ñibe chigugu, katøganun ‘øyeeg søl marmíig køn’ chib marøb pasrønrrappe?

### Srøna kwalømbe chi punrrab kui asamgaig køn

<sup>13</sup>Inchen ñim: “Møin kui, srøna kui, chugøben ciudasrømay amba, trusrø pila ørøba warøwa penamba, yanamba, an nõrrø maramba inchib warønrrab” chibeløbe, mømbe iigwan mørtrai: <sup>14</sup>Ñimbe srøna trumar ñimui øsig amønamigu ni chi punrrab kuinguen mormubendø treendan. Ñimbe ka wañi lataitø køn, møindø kenagúitø, katø yanayube kenamuptinchibig latailøgue. <sup>15</sup>Trembe ñim øyah tamikken søl kønrrun: “Señor treeg kønrrain købene, øsig warøwa, iilan marøb, øilan marøb waramønrrun” tamig. <sup>16</sup>Trune ñimbe nõrreelø kermab isub, treetø isumøtø, truba nõrreelø wamindan. Kan chiyutøgucha øyeeg nõrreelø kermab isub wamindiiløbe purø kaig køn. <sup>17</sup>Møikkøben tabigwan maramig kui ashendø, marmuibe, yandø nuimbe kaig marig kørrømisran.

### Puarmeran kaig attrabigwan isua kønrrai waminchib

**5** <sup>1</sup>Au, ñim puarmera, iigwan møray! Chigøben yeeg trømbøig ñimun nebub attrab pasrøben, kishib, trashib inday. <sup>2</sup>Nimui chigurribunø pua misrøb tøgagúiløbe trerailø køben, ñimui keilane pullilla mailø køn. <sup>3</sup>Nimui oroba, anbabe, mugusiain køn. Incha tru i mugusiatøwei ñimune ‘øyeeg marøbelø køn’ chib, chi marmeelø kui kenamartrun. Tru tsamdzuraibe kan nag lataitøwei ñimui asrwan pinishinrrun. Truba truba chigurribunø tulishib tunbønrsrain køn ñimbe, mõi ya srabe kwalømmerawan. <sup>4</sup>Nimui ellmariilan tulishib melabelan tru tulisaimburø ñim anwan pagaramø nili andøwei ñimune ‘øyeelø kømøgue’ chib, wamab trasan. Inchen Tius maramburab marøbiibe tru uløwan tranmuinabelø trashib wamigwan mørin køn. <sup>5</sup>Ñimbe yu piraube purø tabig warab, asr maig

palai inchen, ñimuiembe treeg marøb waramig tōga, ñimbe waarameran lataig tsal-lana kōn ñimui manrrōmeran, kweetsam kwalōmbe yandø punrrabguen kōn. 6Ñimbe tru sōlgandø tabigwane kaig nebunrrai kōrrōmara, pasra, kweetsig kōn, nōm maig martraindø nōbe chigucha inchimui g kōn.

### Tiusba wamindamiba, Señorwan munig megabig megamiba

7Trune ñim nuneløbe namui Señor arrumnegatig tammay muniirab melamig kōn. Kan ellmarøb kwallibiima ellmarabe, tru srø sre attrabzhigwanba, srabe sre attrabzhigwanba yaandø, yaandø, munig megan, tru pirau ellmarig misrizhigwan tulishinrrappe. 8Ñimgucha treetøwei truba tammay muniirab, katø kōrrōrrab kōmø, mur pōnrray. Kaguende Señor arrumibe laturab pasran. 9Nai nunelø, kangurrin kangurri chigøben ‘ōyan kōtan’ chib; ‘treeg inndan’ chib, waminchimōtay, ñimun marigwan asha, kaigyu kōrrōmara pōnsrainab pōnrrōmōnrrappe. ¡Au! Tru ñimun maig maramigwan asha martrabiibe yandø yaskabuguen pasran.

10Au, nai nunelø, ñimgucha asha kusrewa tōga pōnrrai tru merrabsreelø Tius maig karuigwan tru Señor Tiuswei munchiyu eshkabelø chigøben isumdiig nebuinabendø, yaandø, yaandø tammay melaigwan.

11Pōs nambe mayanguen tab kuilø kui aser chigøben isumdiig puingucha, tru kullaaramø melaptø melabelane. Jobwanma chigøben yeeg isumdiig nebuingucha, tammay ka megaptø megaigwan ñimbe wammørøbelø kuinrrun, katø srabebe Señorbe Jobwane maig indigwan chigucha. Kaguende Señorbe lastima ashib, trurriigu tammay purugub inchibig kōn. 12Nai nunelø, iigwane masken isua kuy: ñimbe srōmbalawan, kabe pirōwan kabe katōgan chigøben, pegwan truilai merrab pasramisra, ‘¡katø! marmø kōmø, nabe maramōnrrun’ chib, pōnrrōmōtø, ñimbe ‘treeg martrab’ chippe, treeg maramig kōn. Inchen ‘marmōnrrab’ chippe, marmumig kōn, Tius kaigyu pōnsrailø kōmōnrrappe. 13Møikkøben ñimui utu chigøben puben, isuig megawabe, Tiusba waminchi. Inchen møikkøben tab kasraatø wappe, Tiuswan tabig waminchib cantau.

14Inchen møikkøben kwanrrø tsuabe, iglesiayu Tiusweimburabelan pera marøb pōnrrabelan wamø, Señorwei munchiyu aceite srøla, nuyasig Tiuswan ‘purugurra’ chib mianrrai.

15Inchen nōmbe Tiusbe ke tamartraitamab isub, Señorba waminchene, kwanrrøbe puraiiben, Señorbe tab uñchai kusranrrun. Inchen chigøben kalø marin kōbene, Señorbe truigwan pesannab ulø paymōnrrun.

16Inchawei kangurrin kangurri ñimui kalø mariilan eshkayab, katø kangurrin kangurri katōganweimburab Tiusba waminday, ñim tammisriilø kōnrrappe. Kan sōlgandø marøb mōg Tiusba wamindiibe truba nørreelø marøbig kōn.

17Tru Elías, Tius maig karuigwan eshkabiima, kan mōg ka nam lataitøwein kōbig kōn, tru sre pumōnrraima, Tiuswan ‘sre pumōnrrai

martrunrrig' chib nõba wamindiibe, pøn pila y tõbø pilaba srebe pirau pumuig købig køn.

<sup>18</sup>Incha katø sre punrrai Tiusba katøle waminchen, srebe puben, piraube ellmariilø misrig købig køn. <sup>19</sup>Nai nunelø, ñimui utu ñim møykkøben Tiuswei newan ciertonigugurri pella, tarømisra iben, <sup>20</sup>katø kalø marøbigwan nui pella yainukkurri lliskøbiibe nui møyig yandø kwanrrab pasraigwan truyugurri wesrub, katø truba nõrrø kaig mariilan kasrøb inchun.